

«MOTTAKERNAVN»
«ADRESSE»
«POSTNR» «POSTSTED»

Trondheim, 19.05.2017

Dykkar ref.:
[Dykkar ref.]

Vår ref.:
2017/2577

Sakshandsamar:
Geir Rune Rauset

Skadefelling av jerv i delar av region 1, utviding av kvote og periode

Miljødirektoratet set etter eige tiltak i verk skadefelling av jerv i delar av rovviltregion 1. Miljødirektoratet v/Statens naturoppsyn (SNO) er ansvarleg for gjennomføring av fellingsforsøket. Skadefelling vert gjennomført for å hindre skade på bufe.

Tiltaket er heimla i lov 19. juni 2009 nr. 100 om forvaltning av naturens mangfold (naturmangfoldloven) § 18 fyrste ledd b) og § 77, jf. forskrift 18. mars 2005 nr. 242 om forvaltning av rovvilt (rovviltforskriften) § 13 jf. §§ 1 og 3.

Vi viser til vurderingane våre i "Grunnlag for skadefelling av jerv i Noreg 2017" og "Skadefelling av jerv i delar av region 1 - 2017" datert 18. april 2017, inklusive lovgrunnlag for tiltaket, skadepotensiale og bestandssituasjon for jerv (tilgjengeleg i Miljøvedtaksregisteret: www.miljovedtak.no).

På bakgrunn av ei heilskapsvurdering av situasjonen pr. i dag vurderer direktoratet at det ikkje ligg føre noko anna tilfredsstillande løysing i det aktuelle området enn ekstraordinært uttak av jerv. Skadepotensiale for sau er gjeve avgjerande vekt i vurderinga. Bestandssituasjonen for jerv, nemnda si prioritering av aktuelle område for uttak og geografisk differensiert forvaltning er andre moment som direktoratet har vektlagt i si vurdering. Eit slikt uttak vert vurdert til ikkje å vere til skade for jervebestanden si overleving, eller å kome i konflikt med det nasjonale bestandsmålet for jerv, jf. Innst. S. nr. 174 (2003-2004) og rovviltforskriften §§ 3 og 4.

Ut frå vurderingane ovanfor og med heimel i lov 19. juni 2009 nr. 100 om forvaltning av naturens mangfold (naturmangfoldloven) § 18 fyrste ledd b) og § 77, jf. forskrift 18. mars 2005 nr. 242 om forvaltning av rovvilt (rovviltforskriften) § 13, jf. §§ 1 og 3, set direktoratet av eige tiltak i verk felling av inntil 2 jerv innanfor nærare avgrensa område i region 1.

Følgjande vilkår er knytt til iverksetjing av felling:

1. Fellingsområde og kvote:
 - a. Årdal og Luster kommunar, 1 dyr
 - b. Odda og Suldal kommunar, 1 dyr
2. Miljødirektoratet v/Statens naturoppsyn er ansvarleg for gjennomføring av fellingsforsøket. Fellingsforsøket vert gjennomført i tråd med fastsett Instruks for det statlige fellingslaget ved uttak av vilt.
3. Vedtaket gjeld i tidsrommet 5 – 7. mai 2017.
4. Miljødirektoratet kan til ein kvar tid trekkje tilbake løyve til felling.
5. Dersom yngling blir påvist i området der forsøk på felling av enkeltdyr er i gang, skal direktoratet varslast og gjere ei vurdering om løyve til felling av enkeltdyr skal endrast til uttak og avliving av årsunge (/ar) og mordyr frå ynglehi.

Dette er ei utviding av periode og kvote for tidlegare avgjerd om uttak av jerv i delar av region 1 frå 18. april 2017.

Et slikt uttak av eige tiltak er ikkje eit enkeltvedtak, og forvaltningsloven sine klagereglar kjem ikkje til bruk, jf. naturmangfoldloven § 18 tredje ledd.

Dette brevet vert sendt til rovviltnemnda, fylkesmannen, gjeldande kommunar og politidistrikt, Klima- og miljødepartementet, Landbruks- og matdepartementet og Mattilsynet.

Løyve til felling vart gjeve i epost til SNO 5. mai 2017. Nemnda og Fylkesmannen vart vidare informert. Same dag (5. mai 2017) immobiliserte SNO ei jervetispe med mjølk i pattane i Utladalen i Årdal. Miljødirektoratet vart varsla og det vart bestemt at tispa med kvalpar skulle avlivast. Tispa vart merka for å lokalisere hiet (telefon og epost til SNO 5. mai 2017, fullstendig vedtak tilgjengeleg i Miljøvedtaksregisteret). Tispa vart utstyrt med radiosendar og sleppt fri. Den 6. mai vart hiet lokalisert med hjelp av sendar, og jervetispe med to ungar avliva.

Helsing
Miljødirektoratet

Dette dokumentet er elektronisk godkjend

Susanne Hansen
fung. seksjonsleiar

Geir Rune Rauset
rådgjevar